



Xogade

BALONCESTO ESCOLAR
XOGOS GALEGOS DEPORTIVOS EN IDADE ESCOLAR

1. INSCRIPCIÓN

A inscrición no programa XOGADE (Xogos Galegos Deportivos en Idade Escolar) formalizarase a través da páxina Web www.deporteescolargalego.com. Pódese acceder tamén a través da web "xogade.xunta.gal".

A data de peche para as categorías benxamín, alevín, infantil e cadete é o 15 de novembro de 2019.

2. CATEGORÍAS

Benxamín: nados/as nos anos 2011-2010 (masculinos, femininos e mixtos), pódese dar de alta 4 xogadores/as nados/as no ano 2012.

Alevín: nados/as nos anos 2009-2008 (masculinos, femininos e mixtos).

Infantil: nados/as nos anos 2007-2006 (masculinos e femininos).

Cadete: nados nos anos 2005-2004 (masculinos e femininos).

3. PARTICIPANTES

Poderán participar neste programa XOGADE, na modalidade de baloncesto, os centros escolares, ANPAS, agrupacións deportivas, escolas deportivas municipais, clubs deportivos e outras asociacións nas distintas competicións organizadas polos servizos provinciais a través das súas Agrupacións Deportivas ou en colaboración coa Federación Galega ou delegación correspondente, no caso en que así o estimen oportuno.

4. ORGANIZACIÓN

A Secretaría Xeral para o Deporte organizará, a través dos servizos de deporte de cada provincia, a actividade deportiva escolar na modalidade de Baloncesto en función do número de inscritos, podendo desenvolverse de diferente maneira en cada provincia en función dos criterios e necesidades de cada servizo.

Para a organización desta actividade poderase contar coa colaboración das agrupacións deportivas de zona, clubs, concellos ou calquera outra entidade pública ou privada que dende a Secretaría Xeral e os servizos provinciais se estime conveniente.

Para a participación nesta actividade a Secretaría Xeral para o Deporte proporcionará aos deportistas un seguro de accidente deportivo gratuíto durante o período de duración da actividade. Este seguro cubre as actividades incluídas no calendario da actividade deportiva escolar de Baloncesto, ata a finalización do programa Xogade o 31 de maio de 2020.

Así mesmo facilitará, no caso de considerarse necesario para a participación na actividade, un servizo de transporte gratuíto, para o cal deberá tramitarse unha solicitude expresa por parte da entidade interesada. Esta será valorada e xestionada polo servizo provincial correspondente.

A participación nesta actividade deportiva será TOTALMENTE GRATUÍTA, polo tanto en ningún caso poderá estar suxeita a ningunha cota de inscrición ou similar.

5. SISTEMA DE COMPETICIÓN

É unha actividade gratuíta

Non é preciso ter licenza federativa

Benxamín e alevín: A participación será nunha competición única en cada categoría, a menos que o número de equipos permita facer grupos de competición femininos, masculinos e/ou mixtos.

A competición será de ámbito local ou comarcal, intercomarcal e provincial, organizada polos servizos provinciais en colaboración coas agrupacións deportivas escolares de zona e a Federación Galega de Baloncesto ou as súas delegacións.

Infantil: A competición será masculina ou feminina, de ámbito local ou comarcal, intercomarcal e provincial, e será organizada conxuntamente polos servizos provinciais de cada provincia en colaboración coas Agrupacións Deportivas escolares de zona e a Federación Galega de Baloncesto ou as súas delegacións.

Cadete: Terá as mesmas normas técnicas e as mesmas bases de competición que a competición infantil escolar, pero será organizada directamente pola FGB, agás nas zonas que non exista competición da FGB, nas que os Servizos Provinciais de Deporte poderán asumir a organización en colaboración coas Agrupacións Deportivas escolares, se o número de inscritos e a distribución de equipos o fai oportuno. Neste caso valoraríase a posibilidade de estender a súa participación a fases posteriores da competición.

6. REGRAS DE XOGO

A) CATEGORÍAS BENXAMÍNE ALEVÍN

Nas competicións zonais que o servizo provincial organice a través da FGB serán de obrigatoria aplicación as regras oficiais de xogo da categoría de minibásquet.

Organizarase un campionato local ou comarcal, agás cando unha competición non reúna un mínimo de catro equipos. Neste caso poderá ter carácter intercomarcal, aínda que é desexable evitar desprazamentos moi longos.

Na categoría benxamín xogárase con equipos de 4 xogadores, sendo obrigatorio presentar un mínimo de 7 e un máximo de 10 xogadores en cada encontro, permitíndose a inscrición dun total de 15 xogadores no equipo. Nesta categoría permítese ademais a inscrición dun máximo de 4 xogadores nados no ano 2012.

Nesta categoría benxamín cada xogador deberá permanecer no banco de substitutos durante un período completo e deberá xogar polo menos dous períodos completos durante os cinco primeiros períodos.

Na categoría alevín permítese a inscrición dun total de 15 xogadores no equipo, sendo obrigatorio presentar un mínimo de 9 e un máximo de 12 xogadores en cada encontro.

Excepcionalmente, o Servizo Provincial poderá autorizar a unha agrupación deportiva ou entidade colaboradora a realizar a competición en modalidade reducida, para facilitar que compita un número mínimo de equipos.

Os equipos deberán levar balóns de minibásquet para o quecemento e, o que figure como local, deberá aportar un como balón de xogo.

Esta competición constará dunha primeira fase local, pasando o primeiro clasificado á fase intercomarcal. O vencedor desta segunda fase clasificarase para o Campionato Provincial.

B) CATEGORÍA INFANTIL

A competición será masculina e feminina e poderase autorizar a participación de deportistas de categoría feminina en equipos de categoría masculina en casos excepcionais, previa solicitude ante a Secretaría Xeral para o Deporte, xunto coa autorización paterna.

A competición será local ou comarcal, intercomarcal e provincial, aínda que cando unha competición local ou comarcal non reúna un mínimo de 4 equipos deberá levarse a cabo con outra comarca ou zona limítrofe co fin de permitir o seu normal desenvolvemento.

Ao comezo da competición, é obrigatorio ter de alta como mínimo a 8 xogadores/as, cun máximo de 15 inscritos por equipo. Poderanse dar de alta ou baixa ata 3 xogadores ao longo da tempada. O número máximo de participantes inscritos nun encontro é de 12 xogadores/as.

O balón de xogo será o regulamentario desta categoría, modelo masculino ou feminino segundo corresponda.

Pódense inscribir ata un máximo de 4 xogadores/as da categoría inferior por equipo, no caso de que a entidade non dispoña de equipo en dita categoría.

Excepcionalmente, o Servizo Provincial poderá autorizar a unha agrupación deportiva ou entidade colaboradora a realizar a competición en modalidade reducida, para facilitar que compita un número mínimo de equipos.

7. ACREDITACIÓN

Será obrigatoria, antes do comezo dos encontros, a presentación do formulario de inscrición na aplicación informática da páxina web "xogade.xunta.gal" acompañado da ficha Xogade de cada xogador/a e responsables con foto (poderá imprimirse dende o apartado "informes"), ou ben co DNI (orixinal ou fotocopia cotexada).

8. - PREMIOS

Os servizos provinciais proporcionarán os premios das fases do programa Xogade nas que corresponda, directamente ou ben a través das súas agrupacións deportivas e entidades colaboradoras.

Os equipos que participen nas fases intercomarcais (no caso de realizarse) e provinciais, recibirán trofeos de 1º, 2º, 3º e 4º clasificado, con medallas para os seus integrantes.

9. - NORMAS

Os regulamentos de xogo, sancións, recursos, etc. serán os que figuran nas bases xerais e normas técnicas do baloncesto. Así mesmo, todos os aspectos non recollidos nestas normas regularanse pola normativa da Federación Galega de Baloncesto e os comités provinciais organizadores.

10. - RÉXIME DISCIPLINARIO

Entendendo que na actividade deportiva escolar deberán primar os aspectos educativos, dando maior peso ao obxectivo da participación e non competitivo, non debora ser preciso o desenvolvemento dun réxime disciplinario mais alá das propias normas de convivencia e educación existentes na nosa sociedade. Aínda así, se fose preciso, poderá ser aplicado o establecido na actividade deportiva federada.

11. - SEGURO

Toda a documentación referente á cobertura do seguro está dispoñible no programa Xogade, na páxina web www.deporteescolargalego.com. Nesta páxina o acceso ao protocolo de actuación e á póliza do seguro é aberto.

Lembren que todo o corpo técnico, deportistas e familiares deben coñecer o protocolo de actuación do seguro de accidente deportivo.